

Pitadi Bepañ'walañ metamdok pepa timen youyemguk Yodakale Mede

Pitadi pepa timen youkuk i yadi kayonbop malabumun wapum ginen hatigin'walañ nadisukilitihik tubukilitiyemdok youkuk. Ala indin youkuk. Kayonbop heki adi Jesu Kilisto'walañ mede momoon wendok kotigon nadisunen. Jesu adi kumuña kotigon kaikaan pilakuk tiña adi kotigon udaneen bubundok yofafaneguk. Metam adi yofafanenin wendok nadiña woomilune baik.

Biyagon, kayonbop heki adi malabumun hekin, inon nemek u mintalak uyadi nadisukiliti ginen fafañen yayatdok mintalak. Undun doktiña nadisukiliti tiña fafañen hatilune Jesu Kilisto kotigon udaneen baik, kan unanin tuwanin momoon beneen.

Pitadi yokahan mede youkuk

¹ Nu Pita, Jesu Kilisto'walañ Aposel hatilatdi Bepañ'walañ metam kwetkwet danepupuhenen Pontas en Galesiya en Kapadosiya en Esiya tiña Bitiniya kwetnen bunambu hatitawin hiditok pepa i youhamulat. ² Bañ Bepañ adi koomkwaha nadihebet tubu hali buguk wendin foloon netok gigit habukahileguk. Undun tiña hidi Jesu Kilisto'walañ medenin takalidok nadiña Ungonin

Munabuli kamehambune hehitubu-lodaune hati-hatihik Bepañdok mindapmaan ungoniñ tigiñ. Unduñ tubune Jesu diniñ nanğatdi hehiyoutewalandaune Bepañ'walañ heben foloñ walandagiñ hatiñ.

Bepañ'walañ siloñ tobogoñ eñ kulemadi hidi'walañkade tokiña hatuwaak.

Hatihati fafañeniñ inditok gigit tiulidokoõñ kameguk woomnimilak

³ Indi Wapumnik Jesu Kilisto'walañ Beu Bepañ niutumbayaneem. Adigoñ Jesu Kilisto kumuñ gineniñ tubukaikaune pilakuk doktiña inditok welekulema wapum tinimiña hatihati kobuli fafañeniñ tubumintanimguk. Indi wendok nadikunakunaleeñ hatiyam. ⁴ Ala kougoñ hatigene kunum foloñ yohikwehik momooñ, fiit mu tibaak, walaniñ hinek, fafañeniñ, hiditok gigit yoña tiulidokoguk hatak, u kahileneeñ. ⁵ Hidi nadisukilitinit hatiñ doktiña Bepañ ne'walañ sañiniññiñdi habudokolak. Adi unduñ titaulune Jesu Kilistodi mintaañ hehitubulodawaak. Ala woñ adi kougoñ nai dapmawaakneñ-ku mintadakalewaak oñ. ⁶ Hidi nai indidegoñ Bepañdi nemek tibaak u nadiña wendok nadifo tiñ. Ingoñ oñ, nai muniniñ-kabe hatilune tikamanda mebimebidi mintahamuña hehitubu-figitaneñ.

⁷ Hidi agan nadiin. Gol* adi fafaenenin mu halaak ingon kudup ginen heune daan foloon hinek u dakalelak. En nadisukilitihik adi gol kalakapmeen nemek foloon hinek tilak. Undugon hinek tikamanda mebimebi mintahamiin won adi nadisukilitihik Kilisto'walaŋkade hatak u miŋgon tubumintalak. Bepaŋ adi unduku tiŋa hidi'walaŋ nadisukilitihik diniŋ mebi tubudakalelak. Kaŋ wendi Jesu Kilisto'walaŋ wougigit tubuhautawaak. ⁸ Hidi yadi Kilisto mu kagin ingon on, hidi aditok hinek nadiŋa welehikdi kahilein. Nai indidegon foloon mu kain ingon on, fiit nadifo tiŋa nadisukilitimiin. Nadifohik wendi kwetfolon nadifo noli haliulak u yalakapmelak. Won adi manikdi mebiŋin yodakalenimdok tuwot moŋ. Moŋ hinek. ⁹ Unduŋ doktiŋa Bepaŋ adi nai indidegon Jesu nadisukilitimilune habuŋa netok habukahileen hanagitak.

¹⁰ Koomkwaha polofet heki adi Bepaŋdi nemek foloon tihamulak wendegon medeŋin yohautagin. Adi yadi Bepaŋdi kotigon nibukahileen ninigilaak yoguk mede wendiniŋ mebi nadidok kwanai baigon hinek tagin. ¹¹ Nai unanin Kilisto diniŋ Munabulidi polofet heki'walaŋ welehik maanen hatiguk. Tiŋa Munabuli wendigon Kilistodi folofigita mebimebi naditauyen me lolonit tibaak wendiniŋ medeŋin yohautaluguk. Wendoktiŋa polofet heki adi nai denin hinek

* **1:7:** Gol adi kawade dabugon malabuhi kwet maanen ikiin, ala kwanaimin tiŋa yehitubu-mintaan moŋgola woon kudup wapum ginen hein. Kaŋ datilitiyen gol foloon mintadakalelak, kaŋ gengen adi folonigon labulak kaŋ gila beŋa yakukiin. En gol foloon adi beŋa nemek fofoon tutumbain.

metam kotigon ninigitdok me u baak, en adi baaknen nemek dediningon mintawaak, undun yonadiyagin. ¹² Polofet heki adi nehitok tiŋa moŋ, hiditok tiŋa kwanailegin u Bepaŋdi agaŋ yenimbihikuk. Mindanŋkade adigili Uŋgoniŋ Munabuli kunum gineniŋ kameune foon metamŋiye yehitubu-lodaune adi'walaŋ Mede Momoŋ yohautaan haningon. Kaŋ aŋelo heki adi undugon nemek hidi kanadi tiin u kakanŋdok hinek nadiŋa woom-hatigin.

Uŋgoniŋ hatidok

¹³ Undun doktiŋa hidi helemahelman nadisukilitidi nadinadihik tiulidokoon hatihatihik momoŋgon kadokoyaneen. Hidi nadisukiliti hinek tiŋa Bepaŋdok nadikunakunale tiŋa woomilune adi silon tobogon Jesu Kilistodi miŋgon mintadakaleune titiŋdok yoguk u tihambaak.

¹⁴ Hidi yadi wapmihi mede nadinadihinit wendok tuwolit hatiyaneen. Koomkwaha hidi yadi nadisuhinit mokit hatinila hide'walaŋ nadi-galika hogohi mebimebi tihatiyagin. Ingon nai indidegon adi undun kotigon mu taneen. Moŋ hinek. ¹⁵ Bepaŋ adi agaŋ koom kuti-haniŋguk. En ne adi uŋgoniŋ tiŋa undugon kudiŋiŋ be titiŋiŋ didimeniŋgon hinek tilak. Undun doktiŋa hidi hatihatihik be nadinadihik be titiŋhik kunilit Bepaŋdok mindapmaan uŋgoniŋ hatiyaneen. ¹⁶ Diki indiŋ hatak, Bepaŋ'walaŋ Youkudipdi indiŋ yolak, "Hidi yadi uŋgoniŋ hatinila talik be titiŋ didimeniŋ takaliŋa taneen.

Nu na ungoniŋ hatilat doktiŋa hidi maan un-
dugon, ungoniŋ hatiyaneen.”

Bepaŋ adi Jesu’walaŋ nangatdi nihituwaguk

¹⁷ Hidi Bepaŋdok “Betnik” yoŋa niutumbain. Betnik adi yadi wotnik doktiŋa mu nihi-
danelak. Adi metam hatihati be titiŋnikdi
mebinik yobihilune nihidanelak. Unduŋ doktiŋa
helemahelemaŋ hidi kwetfoloŋ iŋoŋ hatiŋila in-
diŋ nadiyaneen. Kwet i hatiyam adi yotnikwet-
nik mebi hinek moŋ. I adi hogok buŋambu
hatiyam. Unduŋ nadiŋa Bepaŋ mulelem timiŋa
aditok nadimimbune loloŋnit tuluwaak.

¹⁸ Hidi agaŋ nadiiŋ. Koom adi mamahi-
papahiye’walaŋ hatihati be titiŋ u behatiŋa
wendok kwanai tagiŋ. Ingoŋ oŋ, Bepaŋ adi
agaŋ hehituwaan hatihati be titiŋ foloŋnit
mokit gineniŋ hehikagiyakuk. Tiŋa nemek
kwetfoloŋ liwe tilak, silwa be gol wendi
mu boiŋa hehituwaguk. Moŋ hinek. ¹⁹ Adi
yadi Kilisto diniŋ nangatŋiŋdi hehituwaguk.
Nangat woŋ adi tuwaŋiŋ loloŋnit hinek.
Kilisto adi dompa mihiniŋ walaŋiŋ hinek,
kadakaniŋnit mokit. ²⁰ Bepaŋ adi Kilistodi
kibikoŋnik kameeŋ nihituwadok koomkwaha
kwet mu mintalune timenŋoŋ yohebet tuguk.
Kaŋ nai dapmalune hatiyam indi nihitubu-
lodadok adi Bepaŋdi Kilisto agaŋ kameune
miŋgoŋ mintaguk. ²¹ Adigoŋ hehitubu-lodaune
Bepaŋ nadisukilitimiŋ. Bepaŋ adikuyenŋoŋ
Kilisto kumuŋ gineniŋ tubukaikaan tubupilali
wougigit wapum miŋguk. Unduŋ doktiŋa

hidi'walaŋ nadisukilitihik be nadikunakunalehik u Bepaŋ'walaŋkade hatak.

Bepaŋ'walaŋ mededi fafaŋeniŋ halaak

²² Hidi mede biyagoŋ u nadiŋa takaliune wele-hik walandaguk, unduŋ tiŋa hidi welehikdi me hekinolit folooŋ hinek tigiŋ. Unduŋ doktiŋa welehikdi kifolok tiŋa hatiyaneeŋ. ²³ Tiŋa hidi kobuli kotigoŋ mintagiŋ adi youli liwe tibaak wendi'walaaniŋ moŋ, adi youli kedem hinek, Bepaŋ'walaŋ mede hatihatinit eŋ fafaŋeniŋ ha-laak, uŋaniŋ kadoŋa kotigoŋ mintagiŋ. ²⁴ Tiŋa mede niŋ indiŋ hatak:

“Metam hogohogok adi kilihikit dabugoŋ,
Folonamandaphik adi wowoŋgimiŋ dabugoŋ,
Kilihikitdi sigenelak eŋ wowoŋgimiŋdi gilop-
malak,

²⁵ Ingoŋ Bepaŋ'walaŋ mede adi fafaŋeniŋ ha-laak.”

Bepaŋ'walaŋ Mede Momooŋ iŋakoŋ yohautaan haniŋgiŋ.

2

Jesu adi kawade hatihatinit

¹ Hidi indiŋ nadineŋ. Kadakaniniŋ mu titiŋ, eŋ yalaŋ mede, eŋ me yalamut eŋ nadikwihita tiŋa me yeniwoliwolike, nemek u hogohogok kwihililiwenekut taneŋ. ²⁻³ Hidi agaŋ koom na-didakaleeŋ yogiŋ, “Wapum adi momooŋ hinek.” Unduŋ doktiŋa wapmihi ŋakŋakdi nomdok hogok nadiŋ undugoŋ hidi maan munabulihikdok nom momooŋ Wapum'walaŋ tutumba uŋgoŋiŋ diniŋ Mede Momooŋ wendok nadisuyaneŋ. Unduŋ

tiŋa uŋakon welehiŋ gineŋ nadidahiŋa bedikilitineeŋ.

⁴ Hidi Kawade Hatihatinit'walaŋkade woon galineŋ. Adi Wapum kuyon, kwetfolon medi kahaŋindan mon yogin inŋon Bepandi kan nadiune momoon hinek tubune netok yoŋa kahi-leguk, ⁵ ale hidi Wapum'walaŋkade woon galiŋa kawade hatihatihinit dabuŋon mintaune Bepandi hehitomboyoulune Uŋgonin Munabuli dinin yot tineeŋ. Unduŋ tiŋa Bepan'walaŋ muni heheŋ-mebop uŋgonin tineeŋ. Tiŋa munabulihikdi hehitubu-lodaune hatihatihikdi Bepandok muni unduŋ hemineeŋ. Kan adi Jesu Kilisto doktiŋa nadiune utumbawaak. ⁶ Bepan'walaŋ Youkudip gineŋ mede indin yogin hatak,

“Nu Saiyon tuwaiyeŋ uŋon kawade nin kamelat u kan nadineŋ. Kawade danin momoon hinek u Bepan adi netok yoŋa kahileguk. Ala nebek nin di adi nadisukilitimimbaak adi yadi meka mu nadiwaak.”

⁷ Metam nediyeŋ kawade u nadisukilitimiin aditok adi nadiune momoon en lolonit hinek tilak. En metam nadisukilitihinit mokit aditok adi indin yonit hatak.

“Me yot maman tiin adi kawade i mon yoŋa kahaŋindan bikabuŋin inŋon on, wendigon danin tuguk yatak.”

⁸ En diki indin.

“Metam kawade wendok folonon kayohik youfilidaneŋ. En kawade bigim wendok folonon kayohik youtigiyem tiŋa maan udihiwaak.”

Adi yadi Bepañ'walañ mede nadikabeleen mede wobu tiñ doktiña kayohik youtigiyem tiña maudihilak. Woñ adi agañ koom Bepañdi unduñ tineen yoguk wendok tuwolit mintayemilak.

⁹ Ungoñ tomboyoula indin hatak. Hidi yadi agañ Bepañ netok hinek habukahileguk, eñ ne'niñ siloñ kwanai titindok me wapuhi loloñnit hapmeguk. Eñ metambopñiye ungoñ tiña Bepañ ne'walañ metam, tiña hidi kadakanin dinin mambip gineñ hatilune hautañ mo-moon gineñ hanagila labuguk doktiña niutum-bayaneñ. ¹⁰ Hidi koom Bepañ'walañ metam mu hatigin. Nai indidegoñ adi agañ Bepañ ne'walañ metam hinek hatiin. Bepañ adi koom welekulema mu tihamguk. Nai indidegoñ adigili kedem welekulema tihamulak.

Titin kedem hogok taneen

¹¹ Notneye momohi hinek, nu indin hanimbe nadineñ. Hidi kwetfoloñ wahingon eñ buñambu hogok hatiin doktiña siloda kadakanin, welehi dinin memik u kadakaleen kelekufatneen.

¹² Unduñ tiña metam Jesu mu nadisukilitimiin adi'walañ lekingonhik foloñ didimeningon hatiyaneen. Unduñ hatibune adi hidi'walañ titin kedem u kañ habudakaleen kadakanin titin haniin u wabineen. Unduñ tiña hatigene kougoñ Bepañ baakneñ hidi'walañ titin kedem u kañ Bepañ niutumbaneen.

Wapum'walañ tipilapilaye-me hatiyaneen

¹³ Hidi Wapumdok tiña gapman dinin mapme be me loloñhinithiyedi yodoko mede mebimebi yotiulidokogin u nadinñ tagimneyaneen. Mapme

ne me lolonjit hinek hatilak doktiņa medeņiņ nadi tilolon taneņ. ¹⁴ Tiņa gapman kwetk-wet yapmetauguk adi'walaņ mede maañ nadiņa tiloyaneņ. Adigoņ metam kadakanij titiņ yehitubu-didimeeņ kadakanijhikdok kibikoņ yemaneņ. Eņ metam fofohi adi yeniutumba taneņ. ¹⁵ Bepaņ adi hidi titiņ kedem tubune wendi metam kaulehi, nadisuhinit mokit'walaņ mahik teheyemdok yoņa nadilak. Adi unduņ doktiņa gapman'walaņ mede nadiņa tilolon taneņ hani-lak.

¹⁶ Kilistodi hidi kadakanij diniņ folofolok gineniņ hehifiyakukuk doktiņa hidi yadi foloknit mokit hatiyaneņ. Ala hatihati wendi kadakanij diniņ yawe mu tibaak. Hidi yadi hide nadinadi hatiņila Bepaņ tipilapilaye timiyaneņ. ¹⁷ Noli indij taneņ. Metam hogohogok titiņ momoon tiyemaneņ. Tiņa nohiye Bepaņ nadisukilitimiņ welesilon tiyemaneņ, eņ Bepaņ gikiņgoņ timiņa wou nintiloon niutumbayaneņ. Tiņa mapme maañ gikiņgoņ timiyaneņ.

Kwanai metam diniņ mede

¹⁸ Noli indij, metam kwanai tuwahinit mokit tiņ, hidi bombonģihiedok nadiyembune loune gikiņgoņ tiyemiņa medehik tagimneyaneņ. Woņ adi bombonģi fofohi eņ kulemahidok hogok moņ. Bombonģi me kongolondahi maañ undugoņ tiyemaneņ. ¹⁹ Undihiyen folofigita mebinit mokit hamfit tubune hidi Bepaņ doktiņa hogok nadikulemaan hatibune Bepaņdi habuņa nadiune utumbaluwaak. ²⁰ Diki indij. Hidi kadakanij tubune hidihione kabup

nadikulemaan hatineen ingon on, wendinin kibikon mangon mongotneen? Biyagon, hidi nemek momoon tineen ingon on, hidihifit tubune hidi tokwihitanit mokit nadikulemaan hatineen adigili Bepandi wendok nadihambune utumbaluwaak.

Jesu'walaŋ kayoŋtalik takalidok

²¹ Hidi yadi unduŋ titiŋdok haniŋit. Manŋonde, Kilisto adi talitimen tihamuŋa hiditok folofigita nadiguk. Ale hidi adi'walaŋ kayoŋtalik u kaŋ unŋon takaliŋa uneen.

²² “Adi kadakanin nemu tuguk. En maninŋi yalaŋ nemu yoguk.”

²³ Adi niŋkadakaune kibi mu yeniŋkadakaguk. Be folofigita mimbune kibikonŋdok mede mu yeniŋguk. Adi yadi kibikon kwanai u Bepaŋ'walaŋ kohon folon kameguk. Adi hogokdi mede yodapmaan didimeninŋon tilak. ²⁴ Indi'walaŋ kadakaninŋi adi folon loune kolonŋdabek folon monŋola loguk. Unduŋ tubune indi kadakanin kotigon mu tiŋa unŋonin hatiyaneem yoŋa unduŋ tuguk. Adi utubufigitaŋ wondi indi nihitubu-kedebaguk. ²⁵ Hidi dompa nabuŋon talik moiniŋ ugiŋ, ingon on, nai indidegon adi agan Dompa Kadoko Momoon'walaŋkade udaneen buŋiŋ. Adi kubuŋonŋi hidi'walaŋ munabulihik yabudokolak.

3

Tamwoi'walaŋ mede

1-2 Tam yohohiyehinit, mede timen youlumun undiningon hiditok indin yobit. Hidi yadi hidetok nadiune foune yohohiye hebehik ginen gitagon hatiyaneen. En nin e indin hanimbit. Tam noli, hidi'walaŋ yohohiye adi Bepaŋ'walaŋ Mede Momoon sigilulum timiin, inŋon, tamwoi, hidi wendok yeninto mu tiŋa hidi hide talik didimenin hatibune yohohiyedi hidi'walaŋ hatihatihik u yabunadiŋa welehik tubutakaleyaneen.

³ Hidi sigihik hogok tinahukulimindok kihik hapmuŋ folon tikudikudile, en dahidahi kudikudi momoon hinek, be komkom tuwanin loloŋnitdi tinahukukiiŋ wendi foloon mu tilak. ⁴ Adi tobo tinahukut momohi, kadaka mu tineen, wendi welehik maanen tinahukukaneen. Tinahukut woŋ adi welemomoon en welekulema. Munabulidi welehik maanen titin undihi tubumintaune welehik gumotalak. Tiŋa tinahukut fofoon en fafaŋenin wendi tinahukuyembune Bepaŋdi habune loloŋnit hinek tilak.

⁵ Tam didimehi komihi adi unduŋ tiŋa nadikunakunalehik Bepaŋ'walaŋkade hogok kameyagin kaŋ wendigon folonamandaphik momoon tuluguk. Tiŋa nehitok nadiune fofoyeune nehi'walaŋ yohohiye hebehik ginen kulemaŋon hatiyagin. ⁶ Koom Sela adi unduku tiŋa Abalahamdok me bombonŋi niŋa maŋin mede tagimneluguk. Ala hidi munta mu tiŋa titin didimenin takaliŋa tiŋa adi'walaŋ wabinje hatiyaneen.

Mewoi'walaŋ mede

⁷ Agañ me tamhiyenit hidotokbo hanimbit. Hidi hogohogok wanakan, tamhiyedut mede yonadi momoon en kulemanjon taneen. Tina tamwoi adi sanininhik lonjon hatak doktina yehitubuloda fofonjon taneen. En nemek foloon hinek adi indin. Adi maan hatihati fafanenindok gigit hatiin undun nadiyemina adut welekubugon tina nadifo folon Bepañ ninadiyaneen. Undun tubune nemek nin di ninadihik kamehep tuwot mu ti-hambaak.

Kiukiut mede

⁸ Yon adi wanan kiuthik hanimbit. Hidi wanakan hogohogok welekubugon tina yofulan kitubuloda momoon taneen. Undun tina hidetok nadiune fofonit tubune malabumun be bulanjon nai ginen welesilon en hekinolit momoon tina kitubuloda taneen. ⁹ Mede wendinin diki indin hatak. Kadakanin tihambune kibibo kadakanin mu tiyemaneen. Be haninkadakaune kibimaan mu yeninkadakayaneen. Hidi yadi tobo yeninkahan taneen. Bepañ adi undugon taneen yon hanihehimaneguk. Ala hidi undun tina Bepañ'walañ kahan yabukahileyaneen.

¹⁰ “Nebek nin adi kwetfolon injon nai kweheyenin hatina nadigalika titindok nadikaan adi mebelem kadokoune kadakanin mu tuluwaak, en mami kamehemimbune yalañ mede mu yobaak.

¹¹ Undun tina kadakanin sigilulum timina nemek kedem hogok tuluwaak.

Tiņa kulemanņon hatiņa wendok kwanainņiņ fafaņe tiņa tuluwaak.

¹² Wapum adi metam didimehi'walaņkade dau diwe tiņa yonadihikdok magi kametnadi tilak.

En kadakaniņ titiņ heki adi Wapumdi yabuņa sigilulum tiyemilak.”

Titiņ didimeniņ doktiņa folofigita kedem nadi-dok

¹³ Hidi nemek kedem titiņdok nadigalika tiņa tulune nediyēndi yoņa hehitubu-figitawek, ¹⁴ be titiņ kedem doktiņa hehitubu-figitaneēņ wendok adi welemomoon nadineēņ. Fidihidok hanimuntamuntaye tubune hehele mu taneēņ. Bepaņdi hehikahaņ tibaak doktiņa gweheye mu taneēņ. ¹⁵ Hidi yadi Kilisto welehi maanen kahileune adigoņ Wapum tihambaak. Metam nolidi hidi'walaņ nadikunakunale hatak wendiniņ mebi nadidok haninadiune toboniņbo tubudaneēņ yenimbihitdok helemahelēmaņ mede foloon tiulidokoyaneēņ. Ingoņ mede u kulemanņon eņ gitagoņ nadidakale hinek taneēņ.

¹⁶ Tiņa hidi didimeniņ hatiņila kadakaniņ mu tiņa mede momoon yoyaneēņ kaņ metam hanimunimuniņefit tiņ adi hidi Kilisto'walaņ titiņ kedem takaliņ wendiniņ mebi nadiņa mede yofit tiņ doktiņa meka taneēņ. ¹⁷ Bepaņ'walaņ mede yohebet doktiņa titiņ momoon tiņa folofigita nadinadi wendok nadiwene momoon tilak. Eņ hide'walaņ kadakaniņhik doktiņa folofigita nadinadi wendok nadiwene titiņhik hogohi wendok tuwaņiņ moņgokiņ tilak.

18 Biyakuyoŋ, Kilisto adi nai kubugoŋ hogok kadakaninŋ dininŋ kibikoŋ kumumbune dapmaguk. Adi yadi didimeninŋ hinekdi kadakaninŋ titinŋ indi Bepaŋ'walaŋkade nipmewene unduŋ tuguk. Adi kwetfoloŋ me namandap hatilune ulukumunŋinŋ. Ingoŋ Bepaŋdi tubukaikaune pilali munabuli hatilak.

Imeyout dininŋ welewele

19 Munabuli hatinŋila wooŋ me koom kumunŋinŋ dininŋ munabulihik yot fafaŋeninŋ ginenŋ hatiginŋ u Bepaŋ'walaŋ Mede Momooŋ yenihau-taguk. 20 Metam woŋ adi koomkwaha Nowa adi muwage kwanai tihatilune Bepaŋdi baigoŋ nadikwambundaanŋ wele tubutakale tinenŋ yoŋa woomyemguk, ingoŋ adi mede wobu tiginŋ. Kaŋ metam lufomkabe, 8 hogokdi muwage wendok maanenŋ loginŋ, kaŋ ime gabuŋdi tubupilali yanagilu Bepaŋdi yehitubu-lodaguk. 21 Ime woŋ adi Imeyout dininŋ welewele. Maŋgande, Bepaŋ adi Imeyout dininŋ imedi kotigoŋ hanagitak. Imeyoutdi sigihik dininŋ gengeŋ youtetdok moŋ. Moŋ hinek. Woŋ adi hidi Bepaŋ'walaŋ namanda foloŋ walaŋinŋ hatidok mede yofolok tiginŋ. Eŋ kotigoŋ hanagitdok tali adi Bepaŋdi Jesu Kilisto kumuŋ gineninŋ tubukaikaanŋ tubumintahamguk. 22 Unduŋ tinŋa ne kunum foloŋ looŋ Bepaŋ'walaŋ kohonŋ didimeninŋnenkade ilune aŋelo heki lolonŋhinit be saŋininŋhinit adi nehitok nadiune foune adi'walaŋ hebenŋ foloŋ hatiinŋ.

4

Folofigita ginenŋ dedinŋ tinŋa nihitubu-lodalak

¹ Kilisto adi folofigita nadiguk doktiņa hidi maan undugon titindok fafaneneņ. Unduņ tiņila indin nadisuneņ. Nebek niņ folofigita nadilakdi kadakanin bikabuņa sigilulum timilak. ² Unduņ doktiņa kwetfolon hatihati nai kougon halimilakneņon siloda kadakanin mebimebi mu tiņa Bepaņ'walaņ maņin mede hogok tiņaloon hatiluwaak. ³ Hidi nadisukilitihinit mokitdi hatiņ undiniņ u agaņ koom tuwot hatigin. Unduņ hatiņila kadakanin indin tihatiņ. Nemek kadakanin tigigine be siloda kadakanin mebimebi, be ime fafaneniņ kakaņ nanaņ be kale nanaņ kakaņ nanaņ be hinamuni tiņa ime fafaneniņ kikalakapmeņ folon nanaņ, tiņa Bepaņ'walaņ mede biņa bepaņ yalayalaņ hekidok tipilapilaye tiyemtiyem, unduņ hatitiņ. ⁴ Kaņ yoņ adi nadisukilitihinit mokit adi kadakanin diniņ maaneņ hatilune hidi mu yehitubu-lodain doktiņa mu nadidakaleeņ hanintoņa haniņkadaka tiņ. ⁵ Ingoņ hatigene kougon kaipmuņ hatineeņ be kumuņ tigin wanaņ medehik yodapmandok saņiniņ halimilak adi'walaņkade mede kwanai tineeņ. ⁶ Kumuņ tigin adi indin doktiņa Bepaņ'walaņ Mede Momooņ yenihautanjit. Adi kwetfolon diniņ folonamandap doktiņa kadakanin diniņ kibikon tiņa kumuņ tigin. Eņ Bepaņ'walaņkade ulodineeņ adi munabuli diniņ namandap tiņa kadem hatineeņ.

Nai agaņ dulalak doktiņa tiulidoko titindok

⁷ Nemenemek hogohogok dapmandok nai agaņ dulalak doktiņa hidi baigoņ ila nadidakaleņila

didimeningon nadikwambundaan kedem ninadiyaneen. ⁸ Tiña hidi welehikdigon hinek nadikwambundaan welesilon tiña menot taneen. Mangande, welesilon ginen hatiña kadakanin bibin kedem taneen. Wendi nemek noli hogohogok yalakapmedapmalak. ⁹ Tiña Bepañ'walañ metam noli buña hidigut itoune kañ momoongon hinek yabudokoyaneen. Hidi kwanai u titindok yolakata adi mu taneen. ¹⁰ Hidi Bepañdi silon momoon mebimebi hamguk u metam molomolom hahamulak, ala gitagon yabudokoon behatiña silon tobogon tali mebimebi haliwiin u tinjila kiulihi tiña hatiyaneen. ¹¹ Nediyeñdi Bepañ'walañ Mede Momoon yobaak adi yadi didimenin yobune Bepañ ne'walañ mede hinek tibaak. Nebek nin kwanai mineen won adi Bepañdi saninin mimbune wendok tuwot tibaak. Hidi undun tubune metamdi nemenemek hogohogok tineen u kañ Jesu Kilisto wou folon Bepañ niutumbaneen. Kañ saninin be youtumba u adi'walañkade hakukdi haliwoon halaak. U biyagon.

Kilisto wou doktiña meka mu titindok

¹² Notneye hinek, hidi tikamanda dinin folofigita fulingon mintahamulak wendok nadibedi tiña nemek gitipmun hinek mintanimilak yona boho mu taneen. ¹³ Hidi Kilistodi folofigita nadiguk undugon nadinjila welemomoon nadiyaneen. Ala hatigene kougon wougigitnit mingon mintadakaleune kañ welemomoon hinek nadiña yonadifo

wapum tineen. ¹⁴ Hidi Kilisto wou doktiņa haniņkadakaune Bepaņdi hiditok nadiune utumba tuluwaak. Nemek unduņ tihambune Bepaņ'walaņ Munabuli wougigitņiņdi hidi'walaņkade foon hatilak u kedem nadineen.

¹⁵ Tiyauge hidi'walaaniņ niņdi mik be kubo be kadakaniiņ mu titiiņ be titaboloņet doktiņa kwadi hekiņa yot fafaņeniņ gineiņ fowaakneiņ ala nadinadiņila hatiyaneen. ¹⁶ Eņ niņ adi Kilisto diniņ kayoņbop hatilak doktiņa kwadi hekiwaak be yot fafaņeniņ gineiņ kameune wendok nadiune mekaņgoņ be bulaniņgoņ adi mu tibaak. Adi yadi Kilisto wou u kame hatiņa Bepaņ niutumbaraak. ¹⁷ I nadiineiņ! Bepaņ adi meņimeņiye indi'walaņ mebinik nadinadi kwanaiņiņ tububihila titiiņdok nai dulalak. Indi'walaņkade tububihila tita-wooņ Wapum'walaņ Mede Momooņ sigilulum timiiņ'walaņ tubudapmalune nemek dediiņgoņ hinek mintayembaak?

¹⁸ “Me didimehi yahaņedok kwanaimiņ nobu tiņa kaņ me Bepaņ sigilulum timiņa kadakaniiņ tiiņ hekidok adi dediiņ tiyembaak?”

¹⁹ Wendoktiņa nediyeņ Bepaņ'walaņ hebet takaliņa mik-kwadi folofigita gineiņ loneeņ adi molomhik yehitubu-minta tuguk adi'walaņkade ulodiņa titiiņ fofooņ hogok tomboyoula tiyaneen. Adi yadi undubo yooņ, undubo yooņ mu tilak.

5

Indetok nadinene fofon tuluwaak

¹ Nu talitimeņ nohikdi notneye talitimeņ uņoņ hatiiņ hiditok mede hanimbit. Kilisto

adi folofigita nadilune nu nagon daunedu hinek kagut. Ala hatigene Jesu wougigitnit mintadakaleune u maan kahilewaat. Nu wendoktiŋa mede indiŋ hanindidimewe nadineŋ. ² Bepaŋ'walaŋ dompa bop yabudokodok hapmegiŋ hidi yadi kwanai-mede haniŋgiŋ doktiŋa moŋ, Bepaŋdi nadilak wendok tuwot welehikdi yabukahileeŋ yabudokoyaneŋ. Tiŋa undugoŋ muneŋ bombon tubumintadok nadiŋa moŋ, welehik eŋ kwanaidi foloŋnit titiŋdok nadiŋa taneŋ. ³ Be hidetok nadiune loloŋnit tubune moŋ, adi dompa yabudokoŋ Bepaŋ'walaŋ Mede Momooŋ u hidegoŋ takaliune habuŋa takaliyaneŋ. ⁴ Ala kougoŋ hatigene dompa yabudoko wapum ne buŋa tuwahik dapmandapmaŋnit mokit kulun tehindilendileŋnit mokohambaak.

⁵ Mekuyahi naŋgat kaipmuŋ, hidetok maan indiŋ hanimbit. Bepaŋ'walaŋ Youkudipdi indiŋ yolak:

“Bepaŋ adi metam nehitok nadiune loloŋnit tiŋ adi'walaŋ kasop diliteleyemilak. Ingoŋ metam noli nehitok nadiune fofonŋnit tiŋ adi yehiulihiŋa siloŋ tobogoŋ tiyemilak.”

Unduŋ doktiŋa hidi yadi hidetok nadiune foune me talitimenŋhiyedok nadiyembune loune adi'walaŋ hebehik foloŋ kulemaŋgoŋ hatiyaneŋ. Tiŋa undugoŋ, metam hogohogok, hidi hidetok nadiune fofonŋnit tubune kitubuloda taneŋ. ⁶ Bepaŋ Saŋiniŋ Molom'walaŋ namanda foloŋ hidetok nadiune fofonŋ tubune hatineŋ. Unduŋ tiŋa hatineŋ ala adi'walaŋ nai

mintawaak unanin hanihehibelowaak. ⁷ Bepan adi momoon hinek habudokolak doktina nemek wendok be wendok nadibedi tiin hogohogok u kwihiliweneen Bepandok mindapmayaneen.

Sanjin Molom ne nihikasopnelak

⁸ Hidi hide nadididimeen kikadoko taneen. Memikhik wapum, Sadañ, adi fowa dabugon* undinin tina i be i tina kumuyewit yona manin nan tina tobodindin† tihatilak. ⁹ Ale hidi nadisukiliti tina fafañen yali kelehapene tikutneen. Nohiye kwetkwet noli ginen hatitawiin adi folofigita hidi nadiin undiningon nadiin. ¹⁰ Biyagon, hidi folofigita nai muninin nadilune Bepan silon tobogon Molomdi kasop tihamuna hehitubu-kilitina hehitubu-damda tibaak. Adi Kilisto ne'walañ wougigit dapmandapmanit mokit ginen nongon yayatdok hanihehimaneguk. ¹¹ Adi'walañ sanjiniñin u hakukdi haliwoon ha-laak fafañenin. U biyagon.

Mede yokiliti

¹² Nu mede yon adi Sailas nimbe youhamulak. Nu aditok nadiwene me notne foloon hinek tilak. Nu adi Bepan'walañ silon tobogon dinin mede muninin haniña indin haniñgiginelat: mede won adi foloon hinek ale wendinin maanen fafañeen yatneen. ¹³ Metam Babilon kwetnen‡ hatiña Bepandi Jesu'walañ kayonbop hidut mintadok

* **5:8:** Gilik mede ginen adi laion dabugon yolak. † **5:8:** "tobodindin" adi kiyañeen wonambunat tilak wondok yolak. ‡ **5:13:** Babilon kwetnen youkuk won adi Lomahidok nadiña youkuk. Lomahi'walañ titin u yadi Babilonhidi titin tigin nabugon doktina undun youkuk.

yehidaneguk, adi welemomoon mede hiditok kamehamiin. Enj mihine Mak adi maan nadis-
uhamulak.

¹⁴ Hidi Bepan'wala Mede Momoondi kitubukiliti tinja menot momoon tinja hidebo kohokukut tiyaneen. Tinja Kilisto dut hatiin, hidi'wala nkade kulemadi wanakan tokidapmaan hatuwaak.

**Bepan'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

217908e9-ce08-5ac3-9947-124c48579a74